

*Durante Green Education Symposium III*

## Minister Otmar Oduber a mostra riba e importancia y bentaha di planta nos propio cuminda

**ORANJESTAD** -- Diamars mainta Minister Otmar Oduber tabata presente na Cas di Cultura pa e di tres Green Education Symposium. Aki el a haya un sala completamente yen cu hobennan di e scolnan Maria College, Mon Plaisir College y Juliana School kendenan a mostra hopi entusiasmo. E tema di e simposio di e aña aki ta 'Sustainable Food Supply' y Minister Oduber a enfoca riba e tema aki na un manera hopi habri, mustrand e importancia di por sembra bo mes productonan y hasta a conta con tempo e tabata hoben, e mes a planta na su cas. E mandatario a splica cu awe turismo ta nos pilar economico y prome cu nos tabatin Lago na Aruba, ta agricultura tabata nos pilar economico. "Mayoria di famia tabata biba di plantamento, despues a bin Lago y despues nos a conoce e desaroyo di turismo. Den tempo di gloria di agricultura, Aruba tabata exporta un cantidad di cos, hasta cuero di cabrito tabata wordo exporta".

El a sigui splica cu na Aruba tin tres reto pa planta: mester tin e conocemento, mester sa kico por haci y mester sa na unda por haci. Esey a wordo solucionado y Pa esey Minister Oduber a pidi un aplauso pa Santa Rosa pa e tremendo trabou cu nan ta haciendo. "Awe boso tur akiden ta bay realisa cu boso tur por planta. Mi mes persona tempo mi tabatin 12 pa 13 aña a planta den cura di

mi cas tomati, prominenton, promente, bonchi y maishi". Tambe Minister Oduber a muestra cu awendia cualkier luga chikito por wordo uza pa planta, hasta tin posibilidad pa cria pisca, planta mata y cosecha pareu. Igualmente e mandatario a menciona cu e problema di awa a wordo solucionado. Santa Rosa a sinta hunto cu DOW y diferente otro departamento y awor ta habriendo diferente posnan di awa, poniendo molina di biento y ya caba tin algun trahando na Pos Chikito, na Pavia, na Calabas y otro siman lo habri un otro na Cadushi Largo, despues lo sigui un otro na Tamarijn. Agregando na esaki, Minister Otmar Oduber a indica cu a inverti un suma substancial pa por pone filter nan UV riba e awa cu ta wordo produci na Parkietenbos pa saca e bacterianan afo pa haci suficiente mente bon, liber di bacteria pa wordo uza 365 dia di aña den tur sector di agricultura. Splicando e motibo dicon plantacion ta importante, e titular di Sector Primario a bisa cu no ta solamente pa e bira un actividad economico, pero pa conscientisa tur hende y den e caso aki e hobennan presente di wak den e direccion cu e plannan cu Gobierno y institutonan tin pa bira mas sostenibel, pa nos salud. Probechando cu e tabata entre muchanan hoben, Minister Oduber a bisa cu Facebook por wordo uza pa guianan con pa planta y crece un mata, el a referi aki na e

website di Santa Rosa cu tin constantemente informacion valioso. Tambe el a menciona e proyecto di 10 mil mata di fruta cu ta wordo planta rond di Aruba pa por crea sentido civico den barionan. Ta trata aki di un actividad

social cu por wordo haci cu amigo y bisiña, pero tambe na scolnan. Ya caba na EPB Santa Cruz tin henter un plantacion y lo continua na EPB San Nicolas. Mirando esaki Minister Oduber a bisa cu si algun di e scolnan presente na Cas di Cultura kier

cuminsa un proyecto asina, por tuma contacto cu Santa Rosa. Finalizando el a pidi tur e hobennan, pa despues di e simposio, ora nan yega cas, splica nan mayornan y pa nan mes sa e importancia di por produci nan propio cuminda cu ta uno saludabel. □